

Kontuola

ANTZUOLA / Egubakoitza / 2004ko otsailaren 13a / 189. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Gaztetxea egin nahi dute Gazte Asanbladakoek

AINZANE IRIZAR

Behin-behineko gaztetxea egin nahi dute Gazte Asanbladako kideek. Udalaren lehentasuna, baina, behin betikoa izango den gaztetxearen alde egitea da. Izan ere, Udaleko arduradunen esanetan, ez dago denerako adina diru eta lehentasunak zehaztu behar izan dituzte.

Orain dela pare bat aste egin zuten batzarra Antzuolako Gazte Asanbladako kideek eta Udaleko arduradunek. AGAko kideek eskatu zuten batzar hori egitea, gaztetxeari dagokionez, Udalak ze asmo dituen jakiteko.

AGA-KOAK EZ DAUDE KONFORME

Gazte Asanbladako kideek azaldu digutenez, "minduta" daude Udalaren jarrerarekin, "ez dutelako arazoa konpontzerik nahi". Zera azaldu digute: "Bost urte baino gehiago pasatuko dira behin betiko gaztetxea egin orduko; baina gazteen arazoa orain eta hemen dugu eta horri irtenbidea eman behar zaio". Ildo horretatik, aurreko egubakoitzean egin dako batzar orokorrean erabaki zuten behin-behineko gaztetxea-



JOSETXO ARANTZABAL

Egubakoitz arratsaldean batzar orokorra egin zuen AGAK.

ren alde egitea; proiektua egiten ere laster hasiko dira gazteak.

Udaleko arduradunek, berriz, gazteekin berba egiten jarraitzeko prest daudela jakinarazi digu-

te; bestalde, eta Udalak denerako adina diru ez daukanez, behin betikoa izango den gaztetxeari lehentasuna emango diotela adierazi digute.

OSOKO BILKURA

Udal Etxegintzan, ordezkari berriak

Aurreko egubakoitzean, hilak 6, egin zuen osoko bilkura udalbatzararak. Hantxe, besteak beste, Antzuola Udal Etxegintzako Udalaren ordezkari berriak izendatu zituzten. Bestalde, euskal presoaren eskubideen aldeko mozioa ere aztertu zuten, baina hori ez zuten onartu.

Maiatzeko hauteskunde ondoz udalbatzarra aldatu egin denez, Antzuola Udal Etxegintzan Udalaren ordezkariak ere aldatu beharra zegoen. Horrela, aurreko asteko osoko bilkuran erabaki zuen Udalak zeintzuk izango diren ordezkari berriak; honako hauek izango dira, hain zuzen ere: estatutuetan jasotzen den moduan, Jose Angel Zabalo alkatea izango da Antzuola Udal Etxegintzako presidente berria; Udalaren beste bi ordezkariak, berriz, Dina Muxika eta Jose Ignazio Beltran zinegotziak izango dira.

Horrekin batera, Mireia Unamuno, Juan Jose Azkarate eta Juan Benitez aurreko udalbatzarreko alkatea eta zinegotziak Antzuola Udal Etxegintzan zituzten karguetatik kentzeko erabakia ere hartu zuten.

PRESOEN GAINEKO MOZIOA, ATZERA
Bestalde, euskal preso politikoaren gaineko mozio bat aztertu zuen udalbatzararak. Bi herritarrek aurkeztu zuten mozio hori.

EAJ-EAko zinegotzien absentsioarekin, eta PSE-EEko zinegotziaren aurkako botoarekin, bertan behera geratu zen mozioa.

Bost puntu zituen mozioak eta zera proposatzen zion Udalari: batetik, euskal presoek jasaten duten eskubide ukazioa dela eta, presoek eskubide horien defentsan daramaten borrokarik bat egitea; bestetik, euskal presoak Euskal Herrira ekartzeko eskatzea Frantziako eta Espainiako gobernuei; hirugarrenik, Euskal Herriak askatasunerako bidean irekitako prozesuan parte hartzeko, euskal presoak Euskal Herrian egotea ezinbestekoa dela aldarrikatzea; laugarren puntuan, dispertsioak sortutako eskubide urraketen ondorioz, senitarteko eta lagunei sortzen zaizkien kalte ekonomikoetara egiteko dirulaguntzak ematea eta, azkenik, presoaren egoeraren berri zabaldu eta dagozkien eskubide politikoaren defentsan parte hartzera dei egitea herritarrei.



Senegaldik Antzuolara

Senegalen misiolari diharduen Montserrat Dauso moja kataluniarra herrian izan dugu. Azkeneko urteotan hainbat antzuolar egon da Senegalgo Casamance eskualdean, eta Anelkarrek behin baino gehiagotan batu izan du dirua hara bidaltzeko.

Montserrat Antzuola eta antzuolarrak ezagutzeko gogoz zegoen; bizpahiru egun egin ditu herrian. Astelehenan, afaria egin zuen Anelkarkoekin Danok Bat elkartean, eta Senegalgo kontuak izan zituzten hizpide./A.I.

LABUR


Abesbatzak 750 euro batu zituen Santa Ageda bezperan, Anelkarrendako

Aurreko asteko eguaztenean, Santa Ageda bezperan, hain justu, Antzuolako Abesbatza kantura irten zen, urtero bezala. Koadrila polita elkartu zen, eta herriko kaleetan zehar ibili ziren, Santa Ageda eskean.

Egun horretan herritarren artean batutako diru guztia Anelkar Antzuolako Elkartasun Taldeari eman diote aurten, euren proiektuetarako. Guztira, 750 euro batu zituzten.

Potxin eta Patxin pailazoen emanaldia izango dugu datorren asteko egubakoitzean

Datorren asteko egubakoitzean, hilak 20, Potxin eta Patxin pailazoen emanaldia izango dugu, 17:00etan, udal pilotalekuan. Hurrengo egunean, berriz, zapatua, umeendako beste ekitaldi bat antolatuko du Udal Liburutegiak. Antonino Apreta ipuin kontaketa saioa izango dute neska-mutikoei, Gorringo taldearen eskutik. 18:00etan izango da saio hori, liburutegian bertan.



Diputaziokoak Elay enpresa bisitatzeko egon ziren

Aurreko asteko egubakoitzean, hilak 6, Gipuzkoako Foru Aldundiko ordezkariak egon ziren Elay enpresa bisitatzeko. 2003ko Antton Abadia saria eskuratu zuen Elayk, eta hori dela eta, bertatik bertara ezagutu nahi izan dute enpresa Diputazioko arduradunek.

Antton Abadia sariaren banaketa ekitaldirako Jon Maia bertsolariak Elayri eskainitako bertsoa koadro baten sartuta ekarri zuten, operari, Diputazioko ordezkariak.

Hain zuzen ere, Gizarte eta Erakunde Harremanetarako foru diputatu Fernando Tapia, Euskara Normalizaziorako zuzendari nagusi Xabier Huitzi eta sail horretako zerbitzaburu Gotzon Egia izan ziren Elayn bisitari. /A.I.

LABUR

Olalde elkarteko bazkideek 25. urteurrena ospatuko dute otsailaren 28an, zapatua

Otsailaren 24an beteko dira 25 urte Olalde elkartea sortu zutela. 1979. urtean, egun horretan, egin zituzten elkartea inauguratzeko ekitaldiak. Urteurren hori ospatzeko, hainbat ekitaldi antolatu dituzte datorren otsailaren 28rako Olalde elkarteko bazkideek. Goiz osoan zehar salda, pintxoak eta ardoa banatuko dizkiete elkartera joaten diren herritar guztiei. Ondoren, kalejira egingo dute trikitilariekin. Eguerdian, berriz, pilota partiduak jokatu dira Udal Pilotalekuan. Jarraian, Olaldeko bazkideek eta trikitilariak bazkaria egingo dute.

Espainiari ezetz esango diote hainbat herritarrek bihar, zapatua, Zurrategin

Espainiaren aldetik erasoak jasan dituzten hainbat herritarrek jendaurreko agerraldia egingo dute bihar, zapatua, 12:30ean, Zurrategiko plazan. Martxoaren 14ko hauteskunderi begira, hauteskunde horiek Espainiari ezetz esateko aprobeztatu behar ditugula azalduko dute hantxe. Bestalde, 12:00etatik 13:30era, Espainiako Estatuari salaketa jartzeko agiriak jarriko dituzte herritarren eskura. Salaketa horien oinarria da estatuak Euskal Herria ukatzen duela eta euskaldunon eskubideak ez dituela onartzen.

Arrolak Arantzazu auzoa ezagutzeko ibilaldia antolatu du etzirako, domeka

Etzi, domeka, Oñatiko Arantzazu auzoa ezagutzeko ibilaldia egingo dute Arrolakoek; 09:00etan irtengo dira plazatik. Aizkirri baserrian hasiko dute ibilaldia; handik, Arrola baserrietik pasatu eta Zurkutz mendira (1.182 metro) igoko dira. Araba eta Gipuzkoa lotzen zituen mandabidea ikusiko dute hortxe. Garai baten, gurutzea zegoen mendi horretan; Arrolakoek egurrezko gurutze berria jarriko dute. Ondoren, salda eta txorizoa hartu eta Arantzazura jaitsiko dira. Aizkirri baserrian jaio eta gaur egun Antzuolan bizi den Jesus Odriozola Aizkirri-ri esker antolatu dute ibilaldia Arrolakoek.

HERRITARREN HITZA / Iraia Gabilondo · Ikaslea

Egia absolutua, bai ote?

Badira historian zehar egia absolututzat hartu ditugun gezur biribilak. Agian, egungo ikuspuntutik begiraturaz, nabariena emakumearen egoerari buruzkoa izan litekeela pentsatzen dut. Orain dela gutxi arte emakumearen zeregin nagusia eta bakarra gizonaren beharrianak asetzea beste-rik ez da izan. Emakumezkoak ez omen zuen gizakumeak betetzen zuten eginbeharrak egiteko gaitasunik. Hainbat urte eta mendeetan inork ez du egoera tamalgarri hau zalantzan jarri, horrela izan behar baitzuen.

Hau abiapuntutzat hartuta,

neure buruari galdetzen diot honen zergatia zein ote den. Esaten digutena inongo zalantza izpirik sortu gabe irensten dugunaren ideia da niretzat sendoena. Telebista edo irratia piztu, egunkari bat zabaldu eta bertako informazioa beste-rik gabe sinisten dugu. Ez dugu idatzitakoa, ikusitakoa edo entzundakoa buruzko inongo zalantzarik, eta egiazat



"Esaten digutena inongo zalantza izpirik sortu gabe irensten dugu"

hartzen ditugu. Gure ustea besteen esku uzten dugu, besteek gu baino gehiago dakitelako. Baina, ba al zekien zerbait emakumezkoa ezerezten zuenak? Garai hartako norbaitek pentsatu al zuen hori gezurra izan zitekeenik?

Pentsatzen jarri behar hutsak askotan atzera botatzen gaitu, eta ez gara horren ondorioez jabetzen. Uste duguna bai-

no larriagoa da arazo hau, burbuila baten bizitzera mugatzen gaitu eta, gure ekintzak baldintzatuz, zapalduta dagoena gorrotatuz, eta zapaltzailea, berriz, aintzat hartuz.

Askoz errazagoa da hedabideek esandakoa eta iritzi orokor bat jarraitzea, ustez egin beharreko gauzak egitea, guzti horri aurre egin eta ezberdina izatea baino. Bada behin entzun nuen esaldi bat: "arrain hilek jarraitzen dute soilik ibaiaren emariaren zentzua". Gauzak aldatu egin behar dira, nahiz eta aldaketak egiteko borrokatu behar izan. Baina, egia ote diot?

KIROLA

PARTIDUAK

FUTBOLA

Otsailak 14
16:00: Antzuola-Idiazabal (Erregion.)
Otsailak 15
12:00: Antzuola-Almen (Neskak)

EMAITZAK

FUTBOLA

La Salle 2 Antzuola 1 (2. erreg.)
Antzuola 4 La Salle 1 (Gazteak)
Zestoa 3 Antzuola 2 (Kadeteak)

PILOTA

Eskoriatza II-Olalde (infant.) . . . 18-13
Udaberri Saria
Olalde-Elordi (eskuz kad.) . . . 22-18
Olalde-Eibar (eskuz nag.) . . . 22-8
Olalde-Andazpe (palet. nag.) . . 35-23

SUKALDEKO ALTZARIAK
Harizki

MUEBLES IGEA

Sukalderako eta bainurako altzariak
Altzari rustikoetan espezializatuak

zabalo
IGELTSEROTZA

Jose Luis Zabalo

Kalegoi 9, 1. solairua
ANTZUOLA.
Tel. 943 76 60 89
Faxa: 943 76 60 14

ZAHAR BERRITZEAK:
Fatxadak
Bainugela eta sukaldea
Lokal komertzialak
Teilatuak

**Eta orain....
GREMIOEN
KOORDINAZIOA**